

孝子家傳

初陳安貴公年十三父民光公早世賴母鄧氏撫養成立稍長娶戴氏夫倡婦隨家貧好善得母氏懽心真人生三歲而祖母亡越六載而其父又亡母矢志撫孤真人幼聰穎善讀書恆恨未及事祖並未能事父旋因境艱願執一藝以成名藉藝取貲供母每貰米必或舂或揄倍極精熟恐粗糲不堪下咽也每食不忘親出外遇肥甘必準其家所備母膳相當而後食否則託以己是日茹素久則主人隱知其意先遺其母而後強令真人食曰已遺令慈矣如是者有日真人憮然曰爲人子者已不能

厚母供徒勞人餽何以子爲乃矢念茹素不娶恐薄母膳也頻年不外宿朝出暮入依依膝下猶是祖父母之能得母氏懽心也母歿瘞近宅真人負土成墳卽其旁掛片席而獨居者三年尋寓南市街與友遍遊名勝爲訪道也最後抵武當山遇異人引之祖師巖得道成仙百餘載面貌如生鬚眉活現目炯炯有光溯仙身之所自知陳氏一門積業深矣安貴公字有仁康熙丙戌年十月初九日生乾隆丁巳年四月十三日歿葬陳家衝羊牯腦首乾趾巽德配戴孺人康熙乙酉年正月二十二日生乾隆庚寅年四月二十八日歿葬葛藤坡首巽趾乾與夫墓對

其生真人於故里橫塘以雍正己酉年八月十五日也真人之證果以乾隆癸巳除夕時年四十有六也其平昔裹糧與遊者有道友龔洪朝也其慕道持齋始則同抵師巖繼則歲一往省者有羅甥鍾南也其迎神旋里倡捐建廟者羅君葆吾諸公也嗣因旱禱輒驗兵劫疊銷通詳上憲者知縣袁青綬也會題合奏升聞於朝者巡撫駱秉章也繼而勅封昭顯專祠徧祀其故里之頌禱尤殷也其光曰今之士大夫宦遊數千里外父母歿於家而不知其時日豈意鄉里縫人有每食不忘母又不敢恆受他人之餽遺以供母終乃三年廬墓以依其母如陳真人者

哉宜乎下慰黃泉上格蒼昊願封人之錫類不如是也

邑增生由軍務保舉道銜熊其光曙津謹撰